

Edizioni

- letto 439 volte

Topsfield

I.
Chans, quan non es qui l'entenda,
no pot ren valer,
e pus luec ai e lezer
que mon bel solatz despenda,
ses gap si? un pauc auzitz;
quar totz ditz es mielhs grazitz,
quant a la fi pauz? om ben las razos,
per qu'ieu vuel far entendre mas chansos.

II.
Vas fin?amor fatz esmenda
tot al sieu plazer,
e s'anc passiei son voler,
chantan vais outra fazenda,
a lieys, que de pretz es guitz
me sui juratz e plevitz
sos homs litges, marves, de ginolhos,
ab cor leyal e de totz enjans blos.

III.
Dregz es que selui mal prenda
que trop vol saber
so que plus li deu doler,
e drutz, qu'ab sidons contenda,
non es lonjamen jauzitz.
Quar si dona fai ni ditz,
per eys son pretz, plazer ni joy als pros,
enujos par, qui d'aquo'l mou tensos.

IV.
Non tang qu'ieu midons reprene
ni cove per ver,
ni ja Dieus no'm do poder
qu'encontra lieys mi defenda;
pero si be'm fauc chautzitz

d?aitan sui agelositz
qu?el sieu solatz es tan plazens e bos
qu?a sol mos ops en volgr? aver per dos.

V.

Merce·lh clam qu?el plus m?atenda
si cum fetz parer,
don estau en bon esper;
mas tem que·lh bela·m car venda
lo marabetin marriz,
que·m det un? abetairitz,
aissi cum fetz lo Sarrazis al tos,
don pueys l?aucis autre plus orgulhos.

VI.

Dona, merces vos dissenda
al cor d?un vezer
que·us mostre lo mieu temer,
e vulhatz qu?a mi s?estenda
del vostre joy l?esperitz,
don mos gaugz si?acomplitz;
quar be sabetz qu?ieu no vuelh als de vos
mas que·l fis aurs sobredauratz me fos.

VII.

Si·m faitz pauc, aquelh petitz
vos er de ma part grazitz,
e si·m faitz trop, vostr? er atressi·l pros,
quar Miraval e mon cor tenc de vos.

- letto 581 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/edizioni-845>